

Dithero tsa Tirelano mo Kutlwanong

52/2015 Thero ka Sontaga wa 20 morago ga moletlo wa Borarobongwe, e le ka 18. 10. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, letsatsi le, le kwadilwe mo go Mika 6:8, le re: **"MORENA o go itsisitse tse di leng molemo le tse a di batlang mo go wena:O batla gore o dire tse di siameng, o rate bopelotlhomogi, o tsmaya le Modimo wa gago ka boikokobetso!"**

1. Sefela sa 184 - 170/177

2. Thapelo: Morena, o re itshepise mo boammaaruring. Lefoko la gago ke la boammaaruri. Amen

3. Lefoko la Testamente e kgologolo le kwadilwe m go Gen. 8:18-22;
Epistolo ka fa thulaganyong ya 2 e kwadilwe mo go 1 Bathesalonika 4:1-8;
Efangele ka fa thulaganyong ya 5 e kwadilwe mo go Mareko 2:23-28.

4. A go ipolelwe tumelo ya bokeresete!

5. Sefela sa 416384/400

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Mareko 10:2-16, e re: "Bafarisai ba tla go ene, ba mmotsa gore a monna o letleletswe go tlhala mosadi wa gagwe. Mme ya bo e le go mo lalela. A ba araba a re: 'Moše o lo laotse jang?' Ba re: 'Moše o re letleletse go ka kwala lokwalo lwa tlhalo le go tlhala.' Jesu a ba raya a re: Taolo eo, o e lo kwaletse ka ntlha ya bopeloethata jwa lona. Fela e sa le ka tshimologo ya tlholego 'Modimo o ba dirile monna le mosadi.' Ke ka ntlha ya moo monna o tla tlogelang rraagwe le mmaagwe, a ngaparela mosadi wa gagwe, mme ba babedi ba, ba tla nna nama e le nngwe fela;' ka moo ga ba tlhole ba le babedi ke nama e le nngwe fela. Jaanong se Modimo o se kopantseng, a motho a se se kgaoganye.' *Mo ntlong barutwa ba mmotsa gape ka ga tseo. A ba raya a re: 'Fa motho a tlhala mosadi wa gagwe, a nyalala o sele, o mo senyetsa nyalano. Le mosadi, fa a tlhala monna wa gagwe, a nyalwa ke o sele, o senya nyalano. Tsatsi lengwe ga tsisiwa bana kwa go ene gore a ba ame; mme barutwa ba kgalemela ba*

ba ba tsisitseng. Ya re Jesu a bona, a gakala, a ba raya a re: 'Lesang bana ba tla go nna, lo se ka lwa ba iletsa; gonne puso ya Modimo ke ya ba ba ntseng jalo. Ammaaruri ke lo raya ke re: Motho yo o sa tsholeng puso ya Modimo jaaka ngwana, ga a ka ke a tsena mo go yona ka gope.' A be a ba diketsa ka mabogo, a ba baya diatla, a ba tshegofatsa." Amen. (Thero eno e kwadilwe ka ga Mar. 10:2-9 ka fa go kopilweng ka teng.)

8. Thero: Phuthego e e rategang ya Morena, pele boleo bo ise bo tsene mo lefatsheng, Modimo o tihomile nyalano. Mo go Gen. 2:18. 21-25 go kwadilwe gore "Le gona MORENA Modimo wa re: 'Ga go molemo fa motho a nna a le nosi fela; ke tla mo direla mothusi yo o mo tshwanetseng.' ... Ke fa MORENA Modimo o thulametsa motho; ya re a sena go robala, wa ntsha longwe lwa dikgopo tsa gagwe, wa thiba ka nama, fa lo duleng teng. Mme logopo loo MORENA Modimo o lo ntshitseng mo mothong wa bopa mosadi ka lone, wa mo isa kwa mothong. Ke fa motho a re: 'Ahee, Kana yo ke lesapo la marapo a me le nama ya nama ya me, ene yo o tla bidiwa monnaagadi, gonne o ntshitswe mo monneng. Ke ka moo monna a tla tlogelang rraagwe le mmaagwe, a ngaparela mosadi wa gagwe, mme ba tla nna nama e le nngwe fela. Motho le mosadi wa gagwe ba bo ba sa ikatega ka bobedi jwa bone, mme ba se na ditlhong.'" Go tlhajwa ke ditlhong ga tsena, ya re ba sena go wela mo boleong.

Modimo wa re tihomela boemo jwa ona jo bo boitshepo jwa nyalano, e le jwa go agisanya ga ba le babedi mo leineng la ona, ona o nne mo kopanong ya bone, go ate losika, ga atisiwa losika lwa batho ka tshegofatso ya Modimo. Re a gopola, fa Jesu a dirile sesupo sa ntlha sa gagwe sa kgakgamatso mo moletlong wa lenyalo. Ga tse: "Sesupo seo sa ntlha Jesu o se dirile kwa Kana wa Galelea, a bonatsa kgalalelo ya gagwe, mme barutwa ba gagwe ba dumela mo go ene." Gape Jesu o tshwantsha puso ya legodimo le moletlo o montle wa lenyalo. Ka jalo Motlhodi wa rona o a re ruta, o a re goga gore mo go le le tlang o tla re tihomela moletlo wa lenyalo la legodimo, kwa re tla bonanang ka sefatlhego le sefatlhego le Mopholosi wa rona Jesu Keresete teng, o tla re nnisa teng mmogo le baitshpeo botlhe, mmogo le baengele botlhe, jaaka le jaanong o setse a re baakanyetsa moletlo wa gagwe o o boitshepo mo aletareng kwa re amogelang mmele le madi a ga Jesu Keresete go amogela botshelo le kgomotso, boitshwarelo le tsholofelo, boitumelo le nonofo e ntšhwa go aga le go tlhokomela sentle metse ya rona mono mo lefatsheng.

Mo lefatsheng re tshela fa gare ga nyalano ya ntlha mo tshimong ya kwa Etene le mo lenyalong la bofelo le le sa feleng mo go le le tlang, mo Parateiseng. Modimo o nnaya motho yo montle yo o tlhomameng, yo o ikanyegileng yo ke mo ratang, yo o nthatang gore re le ba babedi re ye teng, re thusanye mo tseleng e e yang legodimong, re tlotlane mo tseleng ya sebaka sa jaanong ka mmele le ka mowa, re se ikgodisanye, mme re ikokobeletsane, re utlwelane botlhoko, re itshwarelane, re thusanye, re tiisanye. Nna ke se buse mo godimo ga mmele wa gago, wena o se buse godimo ga mowa wa me. Re a tlotlana, re le dibopiwa tsa Modimo, Rara wa rona yo o mo legodimong. Ona o nne wa boraro mo nyalanong ya rona. Modimo o tla re botsa mo go le le tlang, wa re: Monna wa gago o kae? Mohumagadi wa ga eno o kae?

Re tla bodiwa gore lona ba lo nyalanyeng, wa boraro mo motseng wa lona ke mang? Thata go tshela mo nyalanong sentle ka go ikanyega mo kutlwanong e tswa mo go Motlhodi wa rona. Tshegofatso ya gagwe e aga motse, e seng botlhale jwa rona, le fa go tlhokega gore go kopiwe botlhale jo bogolo le mo nyalanong, bo tlhokega gantsi. Kutsafalo e tla konyakonya mo mojakong, fa re nyatsa tshegofatso le thuso ya Modimo mo nyalanong. Fa re sa ikopele tshegofatso le thuso ya Morena go sa utlwane go tla simolola mo gare ga batsadi, go tsene le fa gare ga bone le bana, le fa gare ga bana. Fa re re: Ga re tlhoke tshegofatso le thuso, kganetsanyo e tla tsena, le go betsana, le go latlha matlho a rona mo go ba bangwe, re tla tlihabana, go ya re kgaola sesupo sa lenyalo. Kgaolo ya sesupo sa nyalano e tlhaga mo boithatong, mo mafufegelong, mo dikeletsong tse di bosula. Go sale dipelo tse di thata, tse di gagogileng, le bana ba ba lelang dikeledi. Mongwe le mongwe wa motse o tla bo a hutsafaditswe. Khutsafalo eo e tla re felegetsa kwa re yang teng. Boleo bo a hutsafatsa. Ke molao wa jona.

Go sala a a tlang a anya, le masiela. Kana bana ba rona ba tlhoka diatla di le nne, tse pedi tsa mmaabo, le tse di pedi tse di thata tsa ga rraabo. Fa seatla sa tseo se sa tlhole se le teng, ka tlwaelo go sala motho yo mošwa yo o khutlang mo ditseleng tse di maswe. Mme ka thuso ya Modimo le mo go bone go setse go boloketswe ba le bantsi ka go tlhokomela ditaolo tsa Modimo, le go gogiwa ka lorato lwa ona mo go Keresete. Re rutiwa sentle ka mafoko a Pes. 127, a a reng: "Fa MORENA a sa age ntlo, baagi ba yona ba tla bo ba itapisetsa lefela; fa MORENA o sa dise motse, modisa o tla bo a ihlobaeletsa lefela. Ke lefela, fa lo tsoga phakela, lo itima boikhutso, lo ja dijo tsa matsapa; gonne MORENA, o tla

naya baratwi ba gagwe ba ntse ba robetse. Bona, basimane ke neo ya MORENA; leungo la sebopelo ke tuelo. Basimane ba bofšwa jwa motho ba tshwana le metsu mo seatleng sa mogale. Go sego monna yo o e tladitseng mokotlopo wa gagwe; ga a nke a tlhajwa ke ditlhong, fa a bua le baba ba gagwe mo kgotleng.” A re setse re lebetse tse tsotlhe tseo? Modimo o re fa bana ba rona gore re ba supetse tsela e e yang legodimong. O tla re botsa koo mo go le le tlang, wa re:

Bana ba lona ba kae? Modimo o re fa bana gore ba re tlhokomele mo nakong ya botsofe. O tla botsa bone, wa re: “Batsadi ba lona ba kae? Kana ga re beng ba bana ba rona. Modimo ke Morena wa bone, ke mong wa botlhe, wa gago, wa me.

O tsaya monna le mosadi gore ba thusanye mo felong fa. Wena o kabelo ya Modimo ya go nthusa. Nna ke kabelo ya gago ya go go thusa. Go tloga mo tshimologong ya tlholego Modimo o dirile monna le mohumagadi. Ka ntlha ya moo monna o tla tlogela rraagwe le mmaagwe, a ngaparele mo mosading wa gagwe, gore ba nne nama e le nngwe fela. Ga ba tlhole ba le babedi, ba mongwe fela. Ka moo se Modimo o se kopantseng, a motho a se ka a se kgaoganya. A re lemoga bosaitsiweng joo? Modimo o kopanya batho ba le babedi gore e nne sebopiwa se le sengwe se sešwa, a re: Ba tla nna nama e le nngwe fela. Wena le mohumagadi wa ga eno, lo a le mongwe fela. Wena le monna wa gago lo sebopiwa se le sengwe fela. Motlhodi wa lona ke a le mongwe fela. Lo se neele Satane phatlha mo go lona. Ke ene yo o lekang ka metlha go kgaoganya bongwefela jo bontle joo. Lo se leswefatse dipelo tsa lona, gonne dipelo tse di tshwanang le letlapa ga di tswe mo Modimong, mme di tswa mo go Satane le mo dikeletsong tse di bosula. Satane o ila kemo ya nyalano, o ila batho ba ba agisanyang sentle. Bontle joo ke tsela e e yang legodimong. Ke fa “Bafarisai ba tla go ene, ba mmotsa gore a monna o letleletswe go tlhala mosadi wa gagwe. Mme ya bo e le go mo lalela. A ba araba a re: ‘Moše o lo laotse jang?’ Ba re: ‘Moše o re letleletse go ka kwala lokwalo lwa tlhalo le go tlhala.’ Jesu a ba raya a re: Taolo eo, o e lo kwaletse ka ntlha ya bopeloethata jwa lona. Fela e sa le ka tshimologo ya tlholego ‘Modimo o ba dirile monna le mosadi.’ Ke ka ntlha ya moo”, fa thato ya Modimo e batla gore re rwadisanye, re itumedisanye ka mmele le mowa, re nne bongwe fela. Ga go na bongwe jo bo tshwanang mo lefatsheng, fa e se jo bo fa gare ga monna le mohumagadi wa ga gabo. Ke jo bontle mo go kalo, fa Jesu a bo tshantsha le bongwe-fela jo bo leng teng fa gare ga gagwe le phuthago ya gagwe gore mohumagadi a ikokobeletse monna wa

gagwe, jaaka phuthego e mo ikokobeletsa, gape monna a rate mosadi wa gagwe, jaaka Jesu a rata, le go direla phuthego ya gagwe. Ke gona monna le mosadi wa gagwe ba direlane ka dinonofo tsotlhe tsa bone, ka dineo, ka matlhogonolo a rona. Beibele e bua ka botlhale jo bogolo, ya re: "Adame o ne a itse Efa, mosadi wa gagwe; ke fa a nna moimana, a belega Kaine a re: Ke bonye monna ka thuso ya MORENA." Ke a go itse, o a nkitse. Re itse Motlhodi wa rona. Ke ene yo o re itseng. Re a kopa gore re amogele boitshwarelo mo go Jesu Keresete Mopholosi wa rona, re fenye ka ene dipelo tse di thata tsa rona, re nne le lorato le bopelonomi, le bopelontle, re nne le letlhogonolo, ee, re nne le pholoso le botshelo jo bo sa khutleng ka go balelwa tshiamo ya ga Keresete ka go dumela mo go ene. Amen

9. Thapelo: Morena Modimo, Rara yo o rategang, re lebogela Lefoko la gago le re tswang go le utlwa kajeno. Morena, o re fe ditsebe tse di utlwang gore re se ka ra latlhegelwa ke tse re di amogetseng ka Lefoko la gago. Morena, le fa re tswa mo kerekeng, le tsamaye le rona, le re gororose mo magaeng a rona, le re tiise ka malatsi otlhe mo magaeng a rona, le re ise mo bokhutlong gore mo bokhutlong re tsene mo pusong ya gago ya kgalalelo ka ene Jesu Keresete, Morwao yo o rategang, Morena le Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 417 - 385/401

A kagiso ya Modimo e e fetang tlh aloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.